

WANTOK

NIUSPEPA BILONG YUMI OL PAPUA NIUGINI STRET - 26 YIA NAU

28 pes Namba 1,164 Wik i stat long Fonde, Oktoba 17, 1996 50 toea

Em dai long nem bilong gutpela sindaun-Misis Miriung

VERONICA HATUTASI i raitim

"DAI bilong man bilong mi i olsem kaikai bilong samting em i bilip na wok strong long engutpela sindaun i long Bogenvil. Dispela i ken kamap tu olsem mak bilong pinisim hevi long Bogenvil."

Dispela toktok i kam long maus bilong Veronica Miriung, meri bilong leit Bogenvil Primia Theodore Miriung.

Em i kam long Mosbi wantaim bodi bilong man bilong em long dispela wik Mande na long tude Fonde moning, em i lusim Mosbi na go bek long Bogenvil wantaim bodi bilong man bilong em long planim long asples long Burimai long Not Nasioi long Sentral Bogenvil.

Em i toktok na kra i bikos samting we i kamap na pasin we man bilong em i dai i givim sok long am. Ikam inap nau, em i no lusim tingting. Na tu ol birua i sutim em i dai long ai bilong em na tupela pikinini.

"Bikpela samting leit Miriung i bin i laik lukim em gutpela sindaun i mas kamap-i no long Bogenvil tasol, olgeta hap long PNG. Bikos planti pipel bilong PNG na Bogenvil i dai long

Bogenvil hevi," Misis Miriung i tok.

"Long wok bilong em olsem primia, mi bin sapotim em. Bikos mi save long bikpela tingting, laik na wok bilong em long kamapim gutpela sindaun long Bogenvil. Taim mipela i stap yet long bus na bipo long Arawa pis konprens long Oktoba 1994, Theodore i bin strong long go hetim wok bilong kamapim gutpela sindaun na long eria bilong em. Em bin kirapim wanpela pis komiti."

Misis Miriung i tok bikos long daunpasin bilong em na i gat bikpela tingting olsem graun i bikpela samting we God i givim long han bilong man long lukautim. Antap long graun i gat gutpela save bilong pasin kastam, ol pipel bilong Not Nasioi i bin lukim em olsem wanpela lida. Na taim em i resis long sia bilong primia, em i kisim ful sapot long ol pipel.


Misis Miriung i tok man bilong em i no bin stap olsem lokol edvaisa bilong BRA lidasip taim em i stap aninit long kontrol bilong ol.

"Dispela i no trupela. Taim mipela i stap long BRA kontrol eria long 1990 i kam inap long 1994, mipela i bin stap yet long

ples hait wantaim tripela pikinini na lapun mama bilong em. Lapun mama bilong Theodore i gat 90 krismas tasol em stap laip na strong yet. Long dispela taim, Theodore i bin wok strong long sait bilong lotu bikos em bin wanpela Yukaris (komunio) minista. Na em i no save go long wanem hap na lusim mipela long dispela taim," em i tok.

"Mi luksave long wok bilong em tasol long wankain taim tu, mi save olsem famili bilong em i bikpela samting na em i tingim dispela tu. Mipela i sapotim em na taim em i wok i stap long Buka, mi wantaim ol pikinini i save stap, pastaim long Sentral Bogenvil. Na stat long mun Jun las yia taim sampela lain i kukim opis na ka bilong em long Arawa, mi wantaim tupela pikinini i go stap long Siwai i kam inap em i dai.

"Nau mi na famili i lusim gutpela papa bilong mipela na kantri tu i lusim wanpela gutpela lida. Bodi bilong em bai go long liklik ples Burimai we haus bilong mipela i sanap long em. Na lapun mama bilong em wantaim ol hauslain bai planim," Misis Miriung i tok.



• Wanpela meri wantok i sindaun sore wantaim Misis Miriung.

Olgeta Sepik haiskul nogat maniol i no kisim 96 sabsidi

OLGETA 8-pela hai skul insait long Is Sepik provins i bungim bikpela tru long i nogat mani. Dispela long wanem ol i no kisim 1996 skul sabsidi mani we nesanel gavman i aloketim long Is Sepik provins.

Ol dispela 8-pela hai skul em Brandi, Bishop Leo, Yarapos, St Xavier's, Angoram, Yangoru, Maprik na Ambunti.

Bikos long dispela hevi, ol hetmasta bilong ol hai skul ya bai holim wanpela bikpela na impoten miting long dispela wik Fraide Oktoba 20. Insait long dispela miting, ol hetmasta bai toktok, skelim hevi na kamapim disisen long pasim wanwan skul bilong ol insait long arapela tupela wik o go het i go inap long opisal taim bilong pasim skul.

Long dispela wik, taim Wantok i toktok wantaim tupela hetmasta (Brandi na Maprik) na tupela deputi hetmasta (Bishop Leo na St Xavier's), ol i tokaut olsem ol i bungim bikpela hevi tru. Na ol i painim hat tru long ranim na mekim ol wok bilong skul.

Ol i tok hevi kamap bikos olgeta 8-pela hai skul insait long provins i no kisim 1996 skul fi sabsidi mani we nesanel gavman i aloketim.

Wantok i traim long toktok wantaim ol hetmasta bilong Angoram, Ambunti na Yangoru Hai Skul tasol i no inap bikos long hevi bilong komyunikesen o telipon ol i gat. Hetmistrs bilong hai skul bilong ol meri, Yarapos, Sista Angeline Singat i tok em i

nogat toktok long mekim taim Wantok i ringim em long kisim toktok bilong em. Tasol i gat luksave i stap olsem Yarapos tu i bungim dispela hevi.

Hetmasta bilong Brandi Hai Skul, Otto Sauiembi i tok em wantaim arapela 7-pela wanwok bilong em i luksave olsem nesanel gavman i salim pinis sabsidi mani bilong dispela yia i go long provins. Bikos Minista bilong Edukesen Dokta John Waiko i tok long dispela samting.

Mista Sauiembi i tok taim ol i bungim hevi na i go sekap long provinsal fainens opis, provinsal fainens opis i tokim ol olsem i nogat sabsidi mani i kam long nesanel gavman.

"Dispela i mekim mipela i paul. Bikos mipela i no klia long husat i tok tru, nesanel gavman o provinsal fainens opis," Mista Sauiembi i tok.

Hetmasta bilong Maprik Hai Skul Peter Kobania i tok gavman i promis long givim sabsidi bilong dispela yia tasol nogat wanpela samting i kamap. Em i tok skul bilong em i no kisim wanpela trupela samting bihainim promis bilong gavman.

Wantok i traim long kisim toktok bilong provinsal fainens opis na provinsal edukesen divisen tasol i no inap. I gat luksave i stap tu olsem ol vokesenl senta na ol arapela edukesenl institusen insait long provins i bungim tu dispela hevi.

Hia em wanem samting hetmasta bilong Brandi na Maprik na deputi hetmasta bilong Bishop Leo na St Xavier's i tokim Wantok.

BRANDI-Hetmasta Otto Sauiembi:

Skul bilong mi i no kisim sabsidi bilong dispela yia. Bikos long dispela na skul i bungim hevi, olsem hetmasta mi tokim mo along 400 bilong 700 sumatin skul i gat em ol i no pinisim skul fi bilong ol long go long ples. Taim dispela 400 sumatin i go long ples, papa i luksave long hevi na ol i wokhat na painim mani na salim ol pikinini i kam bek long skul. Nau yet, klostu olgeta i kam bek na liklik lain tasol i stap yet long ples. Mi sori pasin skul i mekim tasol hevi i bikpela tumas. Ol papamama i wokbung wantaim skul na salim ol pikinini i kam bek long skul na mi gat bikpela amamas long dispela.

MAPRIK-Hetmasta Peter Kobania:

Yes, bikpela hevi i stap long mani. Mipela i no kisim sabsidi we gavman i promis long givim. Mipela i gat tingting nau long pasim skul. Long pinis bilong tem 3, mipela salim ol sumatin i go long ples. Sampela i no kam bek yet bikos ol i no pinisim skul fi bilong ol. Mipela bai kamapim disisen long pasim skul o nogat long miting bilong mipela ol hetmasta long dispela wik Fraide Oktoba 20. Mipela i tokim ol sumatin long baim skul fi i go inap long K300 bikos mipela i ting olsem mipela bai kisim sabsidi tasol nogat.

BISHOP LEO-Deputi Hetmasta William Rajam:

Olgeta hai skul insait long provins i bungim dispela hevi. Em i tru olsem mipela i bungim hevi long mani bikos mipela i no kisim 1996 sabsidi mani nesanel gavman i aloketim. Bikpela hevi i stap tasol mipela i wok long giaman na go het olsem i nogat hevi. Mipela i pret bikos bikos dispela hevi i mekim putim mipela long mak we mipela bai kamapim planti bis o dinau.

ST XAVIER'S-Deputi Hetmasta Joe Tounokon:

Dispela i no gutpela tumas long sait bilong ol papamama. Bikos i givim arapela hevi gen long papamama. Mipela i stopim ol mentenens wok long skul. Mipela i tingting tasol long lukautim ol sumatin long kaikai-i no wanem kain kaikai, tinpis na rais tasol. Sapos ol hetmasta i bung long Fraide na tokorait, mipela bai pasim skul insait long arapela tupela wik.

Dispela 8-pela hai skul long Is Sepik provins i bungim hevi long taim we ol gred 10 na gred sumatin i redi long sindaun long eksam bilong ol. Sapos ol atoriti long provinsal levul i no mekim wanpela samting long helpim ol hai skul ya, i luk olsem sampela sumatin bai no inap sindaun long eksam bilong ol. Dispela i min olsem ol atoriti long provins i mas lukluk nau insait long arapela wanpela o tupela wik long mekim samting.

Sepik gavman mas luksave long Raun Isi-dairekta

WANPELA bikpela askim i go nau long Is Sepik provinsal edministresen na opis bilong gavana long givim bikpela luksave i go long Raun Isi Tiata we provinsal gavman i papa long en.

Dispela askim i kam long dairekta bilong Raun Isi Tiata, Dennis Lomonduo we long nau yet i skol i stap long Krietiv Ats

skul long Yunivesiti bilong Papua Niugini long Mosbi.

Mista Lomonduo i putim dispela askim i go long Is Sepik provinsal edministresen na opis bilong Is Sepik Gavana, Sir Michael Somare, bikos long nau yet Raun Isi Tiata wantaim ol wok na program bilong tiata i pundaun na stap long graun. Bikos long dispela tiata i no moa

karim aut ol wok na program bilong en olsem bipo taim tiata i kamap nupela.

Dispela askim bilong dairekta bilong Raun Isi long tiata i mas kisim bikpela luksave i kam long provinsal edministresen na opis bilong Gavana Somare i bihainim ol wok na program bilong developim turisim indastri insait long Is Sepik provins. Na tu long promotim na banisim ol kalsa na pasin tumbuna bilong provins.

Wantok i luksave olsem long nau yet Raun Isi i no pundaun pinis. Na ol memba bilong tiata i no moa kam aninit long pe rol bilong provinsal gavman. Dairekta wantaim nambu tu bilong em tasol i stap yet long pe rol bilong provinsal gavman.

Mista Lomonduo i tok Raun Isi i ken mekim bikpela wok long promotim na developim turisim indastri insait long provins sapos provinsal gavman i givim bikpela luksave, helpim na fainensal sapat. Tasol em i tok long sampela yia nau, tiata i no kisim gutpela luksave, sapat na helpim i kam long provinsal gavman. Em i tok bipo Raun Isi i stap long lukaut bilong Nesanel Kalsarel Komisnin (NCC). Tasol taim NCC i lusim, provinsal gavman i lusim tingting olgeta na i no moa givim gutpela na bikpela luksave na tu fainensal sapat na helpim i go long tiata. Bikos long dispela as, em i tok, tiata i pundaun.

Dairekta bilong Raun Isi i tok olsem dairekta bilong tiata, em i gat plen na program bilong tiata long mekim wok. Tasol hevi i olsem tiata i no kisim mani i kam long provinsal gavman. Em i tok gavman bilong provins i noken lukim Raun Isi olsem wanpela grup bilong putim kamap ol pilai long amamasim ol pipel.

"Raun Isi i ken mekim bikpela na gutpela wok long promotim na developim turisim indastri. Em

i ken skulim ol pipel long lukautim kalsa bilong ol. Dispela tiata i wanpela grup we i ken pulim turis i go insait long provins," Mista Lomonduo i tok.

Em i tok ol memba bilong tiata em ol profesenel atis. Nau ol i stap nating, ol wantaim ol famili bilong ol i bungim hevi long mani bilong baim kaikai, bilas, skol fi bilong pikinini na tu ol arapela samting. Mista Lomonduo i tok long las tupela yia i go pinis, planti kalsarel tiata grup i kamap insait long provins aninit long astingting bilong promotim kalsa na developim turisim long provins. Tasol bikpela hevi i olsem provinsal gavman i toktok tasol long developim turisim indastri na i no givim luksave na helpim ol kalsarel tiata grup.

Em i tok sapos gavman long provinsal i toktok long developim turisim long provins orait em (gavman) i mas luksave na helpim wanem kain ol liklik samting ol pipel i kirapim aninit long nem bilong turisim. Em i tok planti liklik wok bilong helpim turisim i save pundaun bikos i nogat gutpela helpim i kam long gavman.

Em i tok long tupela yia i stap olsem dairekta bilong Raun Isi, em i luksave olsem provinsal gavman i nogat gutpela plen o polisi bilong developim kalsa na turisim prosek insait long provins. Em i tok dispela long wanem provinsal gavman i no givim gutpela helpim i go long ol lain husat i go pas long wok bilong turisim.

Mista Lomonduo i askim provinsal gavman long sanapim na strongim gen Raun Isi. Na tiata bai karim aut ol wok na program bilong en long wokbung wantaim ol arapela grup na oganaisesen insait long provins long mekim ol wok bilong turisim.

lalibu lida i laikim pipel long votim gutpela lida

WANPELA lida man blong ples Orei insait long lalibu distrik blong Sauten hailens i salim wanpela tok lukaut i go long ol pipel blong sauten hailens long makim ol gutpela lida long generol eleksen neks yia.

Na em i laikim ol pipel long lusim dispela pasin blong ol kendideit long baim vot, long wanem plenti taim ol man i gat mani tasol i save winim ileksen na i no save gat gutpela wok blong ol.

Paulus Pandeia, wanpela vilis kot megistret long ples orei i mekim dispela toktok long wanpela kibung blong ol manmeri long dispela ples.

Mista Pandeia i tok olsem taim blong ileksen i kamap klostu na plenti ol kendideit i bai go long ples blong ol man meri na giamanim ol long ol kainkain samting long kisim vot tasol.

Em i tok olsem kantri i wok long bagarap long wanem ol lida i wok long mekim ol disisen we i no bihainim tingting blong olgeta pipel long kantri na ol pipel i gat sans long rausim ol lida i no bihainim tingting blong ol pipel.

"Noken guria long mani na samting blong ol kendideit, long wanem dispela ol samting i blong giamanim yu tasol, ol i no gat tingting long wanem kain wok ol i bai wokim taim ol i stap long palamen," em i tok.

Em i tok tu olsem, ol pipel i mas skelim pasin na toktok blong ol kendideit husait i laik sanap long ileksen na ol i mas makim wanpela gutpela man, long wanem sapos ol i votim wanpela lida nogat bai ol yet i bai kisim bikpela taim bihain.

"Tingim gut, wanem kain man yu tingting long votim nau, bai yu yet i kisim taim bihain sapos em i no karimol sevis na wok developmen i kam long eria blong yu," em i tok.

Em i skulim ol manmeri long noken tingim bel blong ol tumas taim ol i givim vot long wanem, wanem samting ol i kisim long sotpela taim i bai pinis na man ol i makim i gat bikpela sans long abrusim olgeta heve blong ol pipel.

Em laikim bai ol pipel long makim wanpela lida husait i bai harim wari blong ol, na lukluk long ol long taim blong heve, o ol i mas makim wanpela man husait i save gut long olgeta heve ol pipel i save bungim.

Mista Pandeia i tok aut tu olsem em wantaim sampela lida man blong ples i bai traim hat long tok save long ol pipel long makim wanpela gutpela lida. long wanem kantri i bagarap na ol nupela man i mas go long mekim kamap sampela senis.



• Mista Lomonduo i aigris long wanpela kundu long opis bilong Wantok.

Bai wasim ol long kol wara

Na i smel gutpela mo!


Chemcare Pharmacies

~~K5.49~~
K7.30



Rexona A/Perspirant
150g-6 varieties

~~K4.25~~



Panadol Elcior
100ml

~~K17.60~~
K14.49



889 Ultra Happy
S/M/L/XL

~~K2.30~~
K1.69



Colgate toothpaste
60g/70g

~~K4.25~~
K3.89

NEW



Kodak Film 12
exp 100ASA


Kodak Balthus
AA 4 pack

~~K2.25~~



Ammens Powder
75g

~~K1.79~~



889 baby powder
100g

~~K1.49~~



Sulf Sess C/M
100/150ml

~~K1.89~~

NEW



889 baby powder
100g

LAE, 4TH Street
KIMBE
KOKOPO
ALOTAU

QUALITY MEDICINE
PROFESSIONAL CARE
CHEMCARE

LAE, Eriku
MADANG
GOROKA
MT. HAGEN
WEWAK

"THIS BANK HAS STYLE."



HEY, I LIKE THAT. Cedek Sakora - Student, POM University

"Mi no bin ting olsem wanpela benk bai tingting long mi. Mi wanpela sumatim yet na mi no mekim planti mani - i no yet. Tasol ol i luksave long mi taim mi toktok long bihain taim bilong mi. Na ol i laikim tru long helpim mi Inog kisim ol astingting bilong mi long haip."

Mipela i save olsem bihain taim bilong Papua Niugini em ol yangpela pipel. Putim mani i go insait long bihain taim bilong ol em bai helpim mipela long kamap bikpela. Olsem na mipela i laikim ol sumatin na ol yangpela pipel long toktok long mipela long wanem samting ol i laik mekim, na long wanem rot mipela i ken helpim ol.

Wantaim ol nupela tingting bilong yupela na save bilong mipela long benking, bai mipela i mekim planti gutpela samting wantaim.



Bik Bro


REBO

KLOSTU FUL-TAIM... REBO KISM BAL NA MEKIM FIL-GOL!!!

GO INSAIT!

BAL I BIHAINIM WIN!!!

!!! NA GO INSAIT TASOL!!!



MAN,, OLGETA SAPOTAS KIRAP NA SINGAUT,,, OL I AMAMAS TRU,,, VIPERS I WILIWILIM OL NOT BEARS. 25-6!!!

SAMPELA SAPOTAS I GO NA APIM REBO!!!

LONGI SEIM TAIM SAI-REN BILONG FUL-TAIM I KARAI!!!




Igo moa Neks Wik!!

SIPAK MAIK

OL I ESKOTIM EM OLSEM WANPELA BIKMAN!!!

ER, BOIS,, INAP YUPELA STOP LONG BLAK-MAKET,,, MI LAIKIM BIA!!

ER,, SORI MINISTA,,, MIPELA INO SAVE GO LONG OL BILAK MAKET,, YU SAVE, TAMBU TRU! NOGUT MIPELA BAGARAPIM NEM!



YU TING MI NO SAVE LONG LO AH? DON'T GIMI DAT KREP!! AI MEK DA LO!!

WAN WIK IGO PINIS,,, MAIK I TINGTING LONG KIRAPIM BISNIS,,,


UMN! ERIA BILONG MI INAP TRU LONGI WANPELA TAKA-BOX!

EM NAU! INSAIT LONG TAKABOKS BAI I GAT 5-PELA POKIES MASIN, NAI SWAN YA!!



Igo moa Neks Wik!!

SUPREME GUTPELA PRAIS



YU GINIS!



WANTOK PABLIK NOTIS

Sapo yu laik advertais, telepon 325 2500 na askim long

Miri Aiori Ext. 214
 Jeffrey Maliou Ext. 215
 Jack Mahuru Ext. 217

JUST ARRIVED

ROOK'S RADIO, IPI, 2ND ST.

P.O. BOX 191, LAE PH 472 4616 FAX 472 6281

- BASS GUITARS K354.00 & K458.00
- LEAD/RHYTHM K278.00 & K340.00
- BATTERY AMP K196.00
- 100 WATT, 4 CHANNEL CARLSBRO
MIXER AMP K660.00
- LOUD HAILERS K159.00 & K233.00
- AND MUCH MUCH MORE.



MINISTRI BILONG JASTIS NA DIPATMEN BILONG ATONI JENEREL.

Minista bilong Jastis, Honorebel Arnold K. Marsipal, OBE, MP, Atoni Jenerel Mista Sao R. Gabi, Len Taitel Komisina na ol wokmanmeri bilong Atoni Jenerel Dipatmen i salim bikpela sori na wari bilong ol i go long papamama, meri, ol pikinini na wanpisin

long dai we i nogat toksave i kamap long leit


THEODORE MIRIUNG.



Bodi na sol bilong em i ken stap wantaim malolo

SAO R. GABI
 Seketeri na Atoni Jenerel


See your weekend World news, Sports and Business news in



WANTOK

buy your
 copy today !!

only 50t



THE Independent

The Voice of Papua New Guinea!

On sale from Friday afternoon in Port Moresby and Saturday morning in the provinces. The Independent keeps you up to date with all the latest national and international news and sport plus separate liftout sections on entertainment, education and a full racing guide.

In-depth reports complemented by a professional team of regular columnists and international news services, The Independent makes great reading every week.

DON'T MISS YOUR COPY!

PROUDLY PUBLISHED BY WORD PUBLISHING COMPANY PTY. LTD.
 P.O. BOX 1982, BOROKO, NCD, PHONE: 325 2500, FAX: 325 2579.




Ph: Miri Aiori Ext. 214, Jeffrey Maliou Ext. 215, Jack Mahuru Ext. 217

PUBLIK NOTIS

COCOA BOARD OF PAPUA NEW GUINEA

TOKSORI

Siaman, ol bod memba, menesmen na wokmanmeri bilong Kakao Bod bilong PNG i salim bikpela toksori na wari bilong ol i go long Veronica na ol pikinini long na Bogenvil Trensesenel Gavman long indai bilong



HON THEODORE MIRIUNG, LLB
PRIMIA BILONG BOGENVIL TRENSESENEL GAVMAN

Taim wanpela gutpela lida i dai, ol pipel i save lukluk i go longwe moa long painim wanpela arapela man long kisim ples bilong em. Long indai bilong leit Primia Miriung, nogat wanpela bai kam na nogat wanpela bai kisim ples bilong em. Leit Miriung i bin wanpela gutpela na stretpela man bilong pis. Maski hevi i stap na tu long namel bilong hevi, em i toktok long pis, praktisim pis, wokabaut wantaim pis, raitim pis na indai long nem bilong pis. Bogenvil na tu PNG i lusim wanpela gutpela na strongpela lida.

Papa God i ken givim em pis bilong oltaim.

SIAMAN
SAM TULO

EKSEKYUTIV OPISA
NICK DARKU



BUKA TOWN COMMISSION

TOKSORI

MIPELA I SALIM BIKPELA TOKSORI, BELWARI NA SORI BILONG MIPELA I GO LONG MERI NA OL FAMILI MEMBA, WANPISIN NA OL PIPEL BILONG MIPELA LONG BOGENVIL LONG INDAI WE I NOGAT TOKSAVE I KAM LONG



HONOREBEL THEODORE MIRIUNG, LLB
PRIMIA BILONG BOGENVIL TRENSESENEL GAVMAN.

TOKTOK BILONG EM: MAS TOK TRU OLGETA TAIM NA NOKEN PRET. MIPELA BAI GO LONG NAMEL-GRAUN.

EM I BIN WANPELA GUTPELA NA TRUPELA LIDA
STAP WANTAIM MALOLO

I KAM LONG SIAMAN, OL WOKMANMERI BILONG BUKA TAUN KOMISIN NA OL RESIDENS BILONG BUKA TAUN.

**TOKSORI**

"MASTA BILONG KAMAPIM GUTPELA SINDAUN I LUSIM LAIP BILONG EM PINIS-NAU WOK BILONG KAMAPIM GUTPELA SINDAUN BAI KISIM LONGPELA TAIM GEN. YU NO STAP WANTAIM MIPELA TASOL MIPELA I SALUTIM YU."

Ol pipel bilong Sentral Bogenvil na Not Solomon provins olgeta nau i lusim wanpela trupela na strongpela lida husat olgeta taim i sanap long nid bilong ol pipel.

Olsem hetman bilong Provinsal Asembli, em i bin mekim wok bilong em long karim aut ol Polisi na Dairektiv wantaim nogat pret na pasin bilong feveretim. Em i mekim wok aninit long ol pawa Nesenel Gavman i putim antap long em.

Tru tumas, Papua Niugini i lusim wanpela trupela lida husat i gat kliapela tingting na luksave long painim gutpela rot long stretim hevi i stap long Bogenvil tude.

Mi kirap nogut long indai bilong em na tu mi egensim tru rot em i lusim laip bilong em. Mi laikim olsem lain husat i kisim em i mas sanap long ai bilong kot na kisim strongpela mekimsave bilong lo.

Wanpela man husat i gat ol astingting bilong em. Na em i save wok hat tru long ol pipel bilong em i mas kisim ol samting we ol i gat rait long kisim. **MISTA THEODORE MIRIUNG** i lusim laip bilong taim em i stap long duti. Tru tumas, dispela kantri i lusim wanpela gutpela lida bilong en.

Ol wokmanmeri bilong Ministri bilong mi, ol oganaisesen husat i kam aninit long Ministri bilong mi na famili bilong mi, mipela i salim bikpela sori na wari bilong mipela i go long famili na ol wanpisin bilong LEIT MISTA THEODORE MIRIUNG long dispela taim bilong belwari, krai na sore.

SOL BILONG YU I KEN MALOLO LONG ITENEL PIS

HON. JOSEPH EGILIO, MP
Minista bilong Komyunikesen
Palamentari Lida bilong Sentral Bogenvil






OFFICE OF THE SPEAKER

TOKSORI

Spika bilong Nesenel Palamen, Rait Honorebel Sir Rabbie Namaliu KCMG, MP na ol wokmanmeri i salim bikpela sori na wari bilong ol i go long famili, ol wanpisin na pren bilong leit **THEODORE MIRIUNG, LLB**

Leit Miriung i bin wanpela gutpela na trupela lida bilong ol pipel bilong em husat i pait long kisim gutpela sindaun long Bogenvil. Long laip bilong em, em i givim em yet long nesenel yuniti na solidariti we em i soim ples klia taim emi wokhat long stretim hevi namel long olgeta lain. Indai bilong em, long rot we i no gutpela na tu i no sapos long kamap, i kamapim hevi long Papua Niugini na bikpela tru long wok bilong kamapim gen belisi na gutpela sindaun long Bogenvil.




THEODORE MIRIUNG, LLB.

Sol bilong em i ken malolo long Itenel Pis!

RT HON SIR RABBIE NAMALIU KCMG,MP
Spika bilong Nesenel Palamen

PAPUA NEW GUINEA
NATIONAL PARLIAMENT

TOKSORI






Kuskus bilong Nesenel Palamen, Mista Ano Pala na ol wokmanmeri i salim bikpela sori na wari bilong ol i go long famili, wanpisin na ol poroman bilong leit **THEODORE MIRIUNG, LLB** long indai bilong em.

Sol bilong emi ken kisim malolo long Itenel Pis.

ANO PALA

Kuskus bilong Nesenel Palamen

WANTOK SPOT



Vanuatu kepten no sapotim Jacque ...PNGFA bai komplon long OFC miting

HENRY MORABANG i raitim

KEPTEN bilong Vanuata soka tim, Noel Vari i tokaut olsem em i no save long wanpela toktok jenerel seketeri bilong Vanuatu Soka Federesen Jacque Tonguet i mekim long ol toktok olsem ol PNG sapota i bin pretim ol Vanuatu pilaia long taim bilong Melanesian Kap long Lae.

Vari husat i save pilai wantaim Pot Mosbi Yunivesiti taim em i skul yet long PNG long las 5-pela yia i tok olsem ol PNG pilai i gat rait long wiri na i no long mekim ol tok baksait nabaut.

"Mi pilai soka long PNG inap 5-pela yia olgeta na mi save long wanem kain futbol ol i save pilaim na wanem samting ol sapota i laikim long ol pilaia. Na mi mas tok olsem dispela las minit pait ol PNG tim i mekim i amamasim tru ol PNG manmeri," em i tok.

Taim Melanesian Kap resis i pinis long Lae long stat bilong dispela mun, Tronquet i bin toktok long Vanuatu olsem sampela pilaia bilong Vanuatu em ol PNG-sapota long Lae i bin pretim ol long taim bilong gren fainel.

Wanpela pilaia nem bilong em Eric i tokaut olsem wanpela sapota long saillain i bin pretim em wantaim naip.

Eric i bin kamapim planti toktok taim em i holim bal insait long gol eria bilong Vanuatu we referi i no bin givim penalti long Papua Niugini.

Tronquet i tok tu olsem taim ol Vanuatu pilaia i stap long Lae, planti man i bin pretim ol tu bipo long gren

fainel i kamap. Tasol em i no yusim dispela olsem wanpela as we Vanuatu i lus na i tok dispela kain ol pasin i mekim na ol pilaia i no inap pilai gut.

Long bekim ol toktok bilong Tronquet, Vari i tok olsem tim bilong ol i kisim bikpela pablik sapot tru long PNG na em i no bilip dispela samting i bin kamap.

"Em i isi tru, sapos yu pilai gutpela futbol na yu no skoaim gol na narapela tim husat i no pilai gut tasol i skoaim gol, em nau yu lus na ol i win," Vari i tok.


Vari i salim bikpela tok amamas bilong em tu i go long olgeta manmeri long pablik husat i sapotim Vanuatu long dispela tonamen.

"Mi ting ol i namba wan tru long wanem ol i sapotim gut tru lokol tim bilong ol," em i tok.

Dispela win bilong PNG nau i opim ai bilong ol long gavman na praiwet kampani long sapotim soka na i no ragbi lig tasol we PNG i ken kisim nem.

Kepten bilong Vanuatu tim i tok PNG i mas luksave long toktok bilong mausman bilong OFC Charles Dempsey long nogat gutpela graun bilong pilai na kisim dispela toktok gut na developim soka insait long kantri.

Long wankain stori yet, PNGFA bai putim wanpela komplon pas i go long Vanuatu Futbol Asosiesen long dispela toktok bilong ol long OFC miting long Nu Silan long dispela wiken.



Kepten bilong Vanuatu soka tim bilong Noel Vari i tokaut olsem em i no save long wanpela toktok jenerel seketeri bilong Vanuatu Soka Federesen Jacque Tonguet i mekim long ol toktok olsem ol PNG sapota i bin pretim ol Vanuatu pilaia long taim bilong Melanesian Kap long Lae. Foto: JOE IVAHARIA

PNGFA bai yesa long senisim pilaia

PNG Futbol Asosiesen (PNGFA) bai wanbel long kisim nupela pilaia i go insait PNG tim bilong ol man. Dispela em sapos wanpela o tupela pilaia nau long PNG skwat i lusim fom o bungim hevi.

Presiden bilong PNGFA Peter Mommers i tok dispela em samting bilong nesenel kosa Richard Nagai long lukluk long en na toksave long PNGFA. Tasol long save bilong PNGFA, ol i ken kisim wanpela o tupela moa pilaia long senisim husat pilaia i no stap fit long kik egensim Nu Silan na Fiji long namba tu raun bilong Wol Kap kwalifai.

"Mi no ting bai nesenel kosa i amamas long kisim wanpela pilaia husat i no moa fit o i gat bagarap long hap bodi bilong em".

Mommers i tok em i isi long senisim ol pilaia husat i gat dispela kain hevi.

Wantok i traim long toktok wantaim PNG nesnel kosa Richard Nagai long aste, tasol em i no stap long opis bilong em. Dispela i wankain tasol long PNG ragbi lig tim taim ol i pilai long ovasis na wanpela o tupela pilaia i bungim hevi, ol i save singautim pilai bek long PNG long kalap long balus na i go.

Mommers i tok PNGFA bai sanap strong yet long kisim bek Australia soka pilaia Manis Lamond i go long Nu Silan na joinim ol manki PNG. Manis em bilong Tubuserea long Sentrel provins na i save pilai long Australia. Mommers i tok em bai larim dis-

YAKAM KELO i raitim

pela tu i stap long han bilong nesenel kosa yet long skelim sapos em i laikim Manis long joinim skwat long kik egensim Nu Silan na Fiji. Tasol long save bilong PNGFA, em bai kisim bek Manis long joinim skwat sapos kosa i tok orait.

Bihain long Melanesian Kap na Wol Kap kwalifai soka resis i bin pinis long Lae long las mun, Manis i go bek long Singapore long kik long hap. Em bai go daun long Sidni, Australia long mun Novemba. Na dispela bai mekim isi tu long em wantaim PNGFA i ken salim toktok i go i kam.

PNGFA bai sambai tasol long kisim Manis i go insait gen long

skwat bihainim tok yesa bilong nesenel kosa Richard Nagai tasol.

Presiden Peter Mommers bai i lusim Papua Niugini long Fonde (tude) nau na i go long Nu Silan long sindaun insait long kibung bilong Osenia Futbol Konfederesen (OFC). Dispela miting em bilong stretim ol toktok bilong holim kamap namba tu pilai bilong Wok Kap kwalifai long Nu Silan long neks yia long mun Februari.

Long bekim ol sampela toktok we i kamap long wanem as tru na PNGFA i holim amamas pati bilong soka tim i go long Mosbi long las wiken, wanpela ogenaising komiti i tok dispela em long amamasim ol bikpela spona olsem MRDC na nesenel gavman na givim dispela

kap o tropi i go long ol. Narapela as tu em long pulim ai na luksave bilong ol kampani long luksave olsem soka i go het nau long kantri. Bikos ol i laikim longtaim sapot we ol i ken pulim wanpela spona bilong i stap longpela taim na developim soka.

Toktok i kamap olsem dispela amamas pati i mas kamap long Lae bikos olgeta sapota na hatwok i stap long Lae.

Tasol komiti i tok ating PNGFA yet i ken luksave long dispela sapot na bel amamas bilong Lae na mekim wanpela amamas pati bilong ol bihain. Tasol long plen bilong amamasim gavman na pulim ai bilong moa spona, ol i laik kisim dispela pati i kam long Mosbi.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.